

湖海樓詞集

冊五

國朝文獻卷

湖海樓詞集卷二十二

宜興陳維崧其年著

選

弟 維岳緯雲 參閱

宗石子萬

男履端

校

姪賜薛

瑤花

秋雨新晴登遠閣眺望

青山如黛綠水如羅映真珠簾罅金閨瑟瑟正青砧
隔院擣衣纔罷登樓遠望見一帶碧雲輕瀉更蕭關
征鴈濛濛愁煞江南此夜 幾回搔首沉吟歎今日
深秋前朝初夏流光遞換問何處更覓鈿車羅帕傷
心故苑依然似天涯客舍對秋風強舉金尊又是夕
陽西下

竹逸邀同雲臣賞欄前粉芍藥用炊聞詞韻

無瑕號國有恨明妃一朵千金價盈盈笑靨倩廚中
櫻笋娛他新夏牡丹剛謝了檀板銀罌纔暇又階前

婢學夫人一樣嬌姿瑩夜芍藥爲牡丹婢

參差粉

面齊呈愛雪驪珠欹幽輝凝射露華微綴垂綰袂淺
向玉欄低亞折來謔贈覺洧水風光堪借記芳名似
喚將離斗頓沉吟花下芍藥一名將離

閩蘭

關心往事纈眼閒窗臥浪紋湘簟幾番親記有幽花
開足露條烟臉紫莖賴甲宜相傍疎簾低檻愛風情
帶篠斜欹花乳和茶細點一朝閩嶠烽馳任荔浦
雲橫鯉湖月慘誰憐翠袖空谷裏也作炎荒竄貶而
今夏也長想像幽姿冷豔思陰陰鼓入冰絃指下餘
香猶泛

春從天上來

壬子元夕

梁宋飄零臥鄼邑殘橋下縣荒亭聞道今夜海碧天
青人世幾度曾經想半生踪跡歡娛短愁緒星星攪
離腸更翻堦急雨只是霖鈴回思春橋夜市對盞
盞星球扇扇銀屏喚馬前情窺簾舊事此際有影無

形算除非夢裏重相見巫女湘靈夢還醒五更竹響
半榻燈燐

錢塘徐野君王丹麓來游陽羨余以浪跡梁
溪闕焉未晤詞以寫懷

烟月杭州記徐卓當年詩酒風流水市露井桂槳蓮
舟老鐵吹裂龍湫奈十年一夢斷橋上落葉颼颼恨
年來只無情皓月猶挂湖頭王郎清歌絕妙邀白
髮詞人同下長洲瑟瑟丹楓濛濛白鴈秣陵總不宜
秋數龍峯歸後人去遠烟纜難留漫登樓數枝殘菊
還替人愁

壽玉峯徐太母同青際賦

林澗逶迤正翠陌纔晴綠水微波昨夜月裏羣玉山
頭無數鳳舞鸞歌恰霓裳入破天風緊音節柔和簇
華筵更禽囀迦陵花雨鬢陀階前宮袍作隊都不
是尋常獸錦龍梭百歲紅萱三枝瓊樹天邊樂事誰
過向蓬萊西笑碧海事別後如何問姮娥蟠桃開處
依舊紅麼

金盞子

詠燈

一盞紅缸灩玉膏
鴛綃皺處偏凝春
夜照梳頭蓮籌
杳淒清牙蒜犀釘
便教煎盡銀荷奈
芳心耿耿敲翠竹
悄喚綠翹簷前蘭
燈將暝 喚遍無人
應且獨自纖手靠
粧臺挑鳳脰宛轉
處重思省當時風
細人靜曾偎壁帶
流蘇剔銀虹潛等
紅綢冷空對並蒂
燈花怎生相襯

安平樂慢

晴郊紀勝

春水如油吳船似
屋較他亭館還多
燕翻油幕鳥啄銀
鈴分棚占斷晴坡
花面梅粧看帽綵
竹粉袂掠蘭莎蜂
蝶媚春羅成團打
塊婆娑 正春壓歌
場花擡酒價半天
戲鼓嵯峨曼衍魚
龍徧念奴悄試一
聲歌急拍將闌艷
觥畔暝翠微波春
游晚半城夜火盈
盈細馬雙馱

雨淋鈴

秋過城南蔣氏園亭追憶瞻武并悼吳傅星
又鄴許墳友諸子

斜陽城闕晚秋行散偶爾游歇故人曾有池館風簾
零亂鏡湖超越花朵柳絲如畫映秋水林樾更三五
知己流連河沒參橫浩歌發 笛聲隱隱霜空闊廿
年餘往事星明滅如今園裏只有荒井畔蟻蛄悲咽
滿目山陽催得盈顛種種華髮最惱是綠水橋邊尚
挂當初月

還京樂

送敘彝上人北游

綠楊外瓢笠蕭蕭喚渡春江尾想此情猶戀齋廚櫻
笋山園桃李向津樓斜倚隔花鞭影回頭指隱隱見
四百八十南朝烟寺 問師何意將三春錦片年光
擲與江東野外沙際况逢連歲關河滿斜陽荒亭衰
壘怕他年又紅鯉無書金鴻少使欲倩神僧咒爲君
禁住流水

萬紅友養病僧舍暇日戲取南北曲牌名爲

香奩詩三十首用填此闕寄跋卷尾

碧苔紙更用成都粉水桃浪研鬪松綾纖膩韭花字
格閒吟閒寫恰翠承朱亞澄心紙鎮銅臺瓦孝穆管
爭願化作珊瑚爲架想僧廬暇竹籬邊行散間招
仁甫酸齋白仁甫貫酸齋金元院本中高手也水際
月下共取趁拍牌名與三唐較量聲價似續紛簇蕃
錦成紈侯鯖製鮓歷亂紅幺點江村蠻豆盈把紅友
自署卍豆村山人

春雲怨

泛舟過顯德寺逢友人同坐僧寮茶話

春山六幅和山前春水朝來齊綠指點前村古寺隔
水經幡烟際矗竟買蜻蜓斜穿釣略搖鰕溪梢一痕
玉隱隱鐘聲迢迢僧語風亞半牆竹遙青媚寺添
幽獨意中人恰到吟情倍足小院松濤又將熟笑向
空王十載塵襟一時盡沐斜日歸庄落紅成陣依舊
閒愁萬斛

喜遷鶯

詠滇茶

胭脂繡纈正千里江南曉鶯時節絳質酣春紅香寵
午惟許茜裙親折小印枕痕零亂淺暈酒潮明滅春
園裏較琪花玉茗嬌姿更別情切想故國萬里日
南渺渺音塵絕灰冷昆明塵生洱海此恨擬和誰說
空對異鄉烟景驚記舊家根節春去也想蠻花玃鳥
淚都成血

雪後立春用梅溪詞體

絮飄綿糅正六花罷舞晴光初繡凍解蛾融雨收鴛
潤煖被笑聲烘就儘紅情綠意倩釵上綵幡輕逗春
信淺似纔青燕尾欲黃鶯脰俛首空感舊暗省年
時有箇人清秀怕裏柑兒衫籠松子淺立粘鷄屏後
別來情事改慙慙也渾如殢酒剩倦影與野塘小寺
早梅爭瘦

清明前一日陪史耳翁飲雪持齋頭

晴簾乍浣被燕蹴紅英遞香窗眼漸漸溪橋迢迢楊
柳一半黃輕綠淺風弄鞦韆不定日煖靡蕪何限春

醪熟囑東陽愁緒暫時分遣 早晚南陌上綉憶雕
輪依約何時斷千載魚燈五侯蠟燭贏得三春夢短
從古禁烟時候祇博鳥啼花怨無聊賴把粉箋細寫
傍人休管

排悶和雲臣韻

憑高指顧歎野水增波故陵無樹萬疊金笳千尋鐵
鎖依舊大江東去休管周郎安在便覓桓溫何處長
嘯罷怕永嘉草草不成南渡 遲暮縱有日採藥蓬
萊恐被神仙誤姚女難歸羿妻不返歲歲亂紅迷路
悶把唾壺輕擊愁對寶刀低訴空城下聽寒潮徹夜
魚龍聲怒

華漢章招飲聽蘇崑生度曲

風簾霜院有一派晴秋暗縈窗練酒辣侵唇菊香撲
鼻黃雀紫蠟初薦正值客心悽處那禁夜烏啼斷絳
蠟底恰白頭賀老江潭重見 離怨言不盡水市燈
昏試取檀槽按宛雒家鄉武昌樓櫓往事暮雲分散
蘇中州人又常客左寧南幕愁似長空颺絮淚比真

珠脫線君休唱惹青衫濕了再無人管

石濂和尚自粵東來梁園爲余畫小像作天女散花圖詞以謝之

月明珠館有帝釋鬘陀身雲散滿蛟國旌幢鬘帆笳
吹萬疊雪傾銀濺裝罷紅棉粵嶠看足蒼楓梁苑饒
能事儘微皴澹抹黃深絳淺篋衍有一卷細膩凝
脂三尺松陵絹少不如人師須爲我畫出鬢絲禪板
旁侍湘娥窈窕下立天魔蹇產人間苦悵碧桃花謝
洞天歸晚

立冬

西風忒峭把似錦濃秋霎時都掃林影添黃潭痕減
翠易損他鄉懷抱甕頭索郎未熟盃口獵徒還少燕
市畔漸消寒九九排當畫稿那曉人世事月令歲
華慣是田家好摘菜淹菹燃糠煨芋夜火村村打稻
惆悵年來殘夜催着朝衫偏早憑誰說向茅簷曝背
溪南詩老

探春慢

連朝大雪計桐初尚未達東阿也詞以憶之
索京少叢山和

四野瓏鬆一城飄瞥滕六作黃塵舞低閣憑闌遙天
策騎人在最微茫處曾對君家說且看了春燈方去
那知一夜離情六花頓釀如許雪沒中原無路料
尚隔東阿幾程烟樹冷驛搖鞭亂山卸馭酒向何村
貰取逼暝投山店衾似鐵一燈無語夢入江南小庭
梅萼初乳

新正四日東華門道上同徐電發並轡作

冰泮金塘雪消碧瓦已將春霽閒作畫鼓敲時繡旗
颺處輦道晴絲嬌情遼后粧樓在記樓上朝天梳裏
如今白玉欄杆無數燕泥輕墮詞客吟情無那怕
路近天家鞭影微驕一抹斜陽幾朝禁苑牆下橐駝
閒臥縱到花開日問曾否連昌上鎖多少新愁恰被
宮鶯啼破

綺羅香

清明感舊

綠水樓臺青春院落又是韶華百五錫粥榆錢過了
匆匆時序怕今年玉剪來時是去年鈿車停處最難
憑輕暖輕寒天涯羈客甚情緒少年此日嬉游有
窺簾綺態當爐俊侶一自飄流冷落天桃門戶西樓
外幾陣鶯花北邙上一堆羊虎向斜陽斷碣殘碑多
少橫官路

初夏連夜於許茹庸仲修席上看諸郎演牡丹亭有作

許掾多情清和佳節連夕嬌歌妙舞料得眉峯碧到
愁時都聚記昨宵銀瑟初停又此夜紅牙再補看一
羣燈下諸郎依稀盡解此情苦獨有江東詞客爲
家山路遠倍增淒楚回首朱門略記蟲娘庭戶好院
本全部笙簫沒心情半生羈旅比年時攜手聽歌多
了黃昏雨

詠海棠

褪盡梅粧飄殘杏靨春事今年恁快滿樹紅綃已把
小樓遮礙二分醉午酒嬌痕一味嬾晝眠慵態記箇

儂萬里家鄉西川遠隔蠻江外
惜花燒盡銀燭花亦相看熟
懣懣長在着水啼烟鎮向餘寒
忍耐纔深巷帶雨斜開又前街
提籠爭賣惹人是幾陣春秋愁
撚一枝誰戴

詠落梅

滿院濛濛半園寂寂萬隊銀鸞
齊跨壓帽籠鞭無數檻邊廊下
驚夜靜粉淚難乾趁陰重冰魂
易化更憐伊漱雨梳風樓東顏
玉粧初卸有人剪燭偷炤腸斷
紅香侶憶他嬌妬拾取盈盈和
麝題封綃帕記當日冷淡交情
付他年水天閒話空遺下瘦榦
斜枝向橫窗暗寫

詠櫻桃

小摘勻圓低擎嬌俊萬顆輕紅
同瀉綠葉陰濃正值江東初夏
苦裙濕裏處如無珀盤滑盛時
欲化正小樓樊素偷含丹唇比
似誰真假熟時江岸野館曾壓
他低帽籠他細馬此際重拈試
與端詳嬌妬休還問紫禁金盤
最難忘紅窗綃帕入手更和淚
相看鎮

胭脂盈把

春日詠蘭

離墨山前善權洞口一逕紅蘭堪藉露眼如啼掩冉
溪庄水榭趁雨摘螺黛青分帶烟采蝶裙碧化妬歸
樵滿擔清芬日斜纖手剛盈把紫莖暗數漫剪還
取春泥壘粉紅牆罅午困粧餘慣是向人沾惹被玉
軫彈上銀蟬向犀奩和些冰麝待閒裏焙入龍團小
窗供夜話

詠薔薇

樓外金墉巷頭銀井隱約非花非霧一片胭脂祇許
鶯梭穿度怯攀折綠刺潛防賣窈窕紅情暗與隔綃
窗背着軟韃朦朧最是竊香路小拈螺子鈿盒將
露華傳體妬他鴛侶一架薔蘿重取殘春填補看裊
裊風裏腰肢是盈盈夜來情緒誰悄把綉譜親描惹
牆花漫妬

龔節孫錄余所選今詞賦此奉柬

浪打新亭霜飛故國誰許詞場稱霸紅豆金莖漫向

夜深謄寫半閒鈔酒館銀牆半偷傳粧樓羅帕到如
今粗比牛腰叢殘卷軸蝸涎挂太息韋莊牛驕問
如何偏遇極天兵馬珍重君家重覓蠻牋細研看殘
秋滿篋香詞是老夫半生愁話囑宵闌好護烏絲莫
使缸花炮

題宋旣庭小照圖作長松竟幅

昔夢都非舊游頻換秋夜一燈吾汝彩筆憑陵壓盡
曹滕邾莒曾見說緩臂難封又聞道蛾眉工妬任紛
紛項領兒郎薰香剃面畫衣袴誰將東絹一匹敝
銅身鐵鬣翠交蒼互子落濤鳴下有幽人箕踞看幾
簇露葉烟條經幾場落花飄絮鎮朝昏吟雨啼風慣
爲渾脫舞

眉嫵

壬子除夕

又殘更冉冉往事星星短髻被霜染夢入屏山路黃
昏近金荷一盞慵點濃陰微慘任小樓和雨輕掩算
今夜笑語香街沸有春勝雙颭思念愁多類魘記

簾窺秀黛柱映嬌臉詎意分飛後相思苦淚滴桃笙
紅淡長江天塹况萬重敗驛荒店料此際有人只爲
我翠蛾斂

花心動

二月八日微晴同雲臣過北郭外訪寒松上人
人不遇紀事

薄靄新暘翠禽啼綃窗乍催人醒弄袖風微印屐泥
乾村館酒旗低映相攜緩步迴塘上尋春寺聊添吟
興畫溪尾葡萄初漲遙川綠竟叩罷禪扉誰應剩
花底經幡烟中齋磬竹院因循水郭遲回忍負雨餘
妍景春衫且把橋欄倚閒數徧碧紗官艇前溪裏一
行社歸人影

瀟湘逢故人慢

題余氏女子綉柳毅傳書圖爲阮亭賦

龍綃一幄有靈芸針線刺鳳描鸞秋水漾波瀾正洞
庭歸客憔悴思還牧羊龍女恰相逢雨鬢風鬟看多
少沙明水碧一天愁緒漫漫却又早來橘浦見兒